

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-03767-2014
Broj akta: 05EN-001
Gračanica, 4.11.2014.godine

Z A P I S N I K
SA 23. SJEDNICE OPĆINSKOG VIJEĆA
GRAČANICA

Održane dana 30. 09. 2014. godine u sali za sjednice nove zgrade Općine Gračanica sa početkom u 12,00 sati.

Početku sjednice je prisustvovalo 26 članova Općinskog vijeća Gračanica. Odsutni su :Hasić Mujo, Ahmetašević Jasenka, Dedić Dino i Selimović Senad.

Sjednicu je otvorio i istom predsjedavao Edin Ibrišević, predsjedavajući Općinskog vijeća Gračanica, zajedno sa zamjenikom Seadom Gazibegovićem i Sekretarom Općinskog vijeća Gračanica Zehrom Mujačić.

Zapisnik vodila Naimkadić Mevlida, a vršilo se i tonsko snimanje sjednice. Pored članova Vijeća sjednici su prisustvovali i : Općinski načelnik Nusret Helić, Azra Mustajbašić, Mustafa Bajić, Zijad Dedić, Aida Hodzić, grupa građana MZ Lukavica, grupa građana MZ Donja Orahovica, predstavnici Plenuma Gračanica, radnici Grafopaka, predsjednica Etičke komisije Sabina Hasić, te predstavnici sredstava informisanja.

Zapisnik sa 22. redovne sjednice Općinskog vijeća Gračanica usvojen je jednoglasno.

Pitanja i inicijative kandidovali su:

Omerdić Mirza:

“ Javio sam se iz jednog prostog razloga.Dakle u novinama sam pročitao da se desio jedan incident na fizičkom. Predpostavljam desila se nekakva tuča i da je to jedan od uzroka i manjak prostora u školi ,u Mješovitoj srednjoj školi. Dakle puno razreda ima ,pa bih htio da kažem da moramo razriješavati tu stvar da nađemo alternativne načine da ljudi rade fizičko kako se ne bi grupisali u tolikom broju. Ja znam da mi imamo i prioritetnih stvari vezano za ove poplave, ali evo i ovaj nam se problem pojavio pa da jednostavno iznadujemo nekakvo rjesenje, kako bi nam se ne dešavale ovakve stvari.“

Pjanić Safet :

“ Ja imam pitanje za načelnika Općine, kad je u pitanju posipni materijal. Ima li iko načelnice u Općini sem vas kome se može obratiti jedan vijećnik ili neko ko ima autoritet da mu se odobri kamion ili dva prljavog šodora. Ja sam bio dogovorio sa Jusufom da mi da dva kamiona za MZ Škahovica, zvao me vijećnik iz MZ, Jusuf je bio obećao. Zovem ga poslije dva-tri dana,kaže jesi li zvao Reisa, ko je reko Reis? Kaže,načelnik. Zovem načelnika, nedostupan. Mislim da je to jedan vid autokratije.Možete reći ko je to da se

može nazvati, a da on sa vama komunicira i da se to odobri .Neću ja sebi u svoju avliju jer je prljavo, ali hoću da se pomogne bilo kojoj MZ ne gledajući ko je i koji su prioriteti u dodjeli tih materijala. Je li to gdje je SDP na vlasti ili nešto drugo. Ako je to kriterij, recite da znamo da više ne zovem. Jeste li načelnik svih građana ili ste načelnik ondje gdje je SDP? Toliko.“

Topčagić Mirzet :

“Ja imam vijećničku inicijativu prema Direkciji za puteve TK-a. S obzirom da bez obzira na nedavnu prekategoricizaciju puteva koja stupa na snagu od 01.11.2014.godine,u kojoj je Regionalni put R-460,tačnije mislim na dionicu tog puta Gračanica-Bukva, prekategoricisan u Magistralni put drugog reda i samim time prelazi pod nadležnost Federalne direkcije za ceste,imam informaciju da je održavanje i saniranje pomenute dionice u vašoj ingerenciji do kraja tekuće kalendarske godine zbog ranije potpisanih ugovora sa dobavljačima. Stoga, upućujem Vijećničku inicijativu da se što prije pristupi sanaciji oštećenja na pomenutoj dionici puta, tačnije radi se o tri velika odrona (klizišta) na relaciji Gračanica-Bukva, gdje je trenutno u funkciji samo jedna saobraćajna traka,a i ona je upitna, jer su odroni iz dana u dan sve veći,tako da je pitanje dana kada će put u potpunosti biti presječen. Zanima me šta je u planu sa sanacijom ove dionice, jer sam na WEB-stranici Kantonalne direkcije pronašao raspisane tendere za sanaciju određenih puteva,oštećenih u proteklim vremenskim nepogodama,ali za sanaciju ove dionice koliko sam informisan još ništa nije poduzeto”. Obrazloženje: Zbog važnosti ovog puta apelujem da se oštećenja na ovoj dionici saniraju maksimalno koliko je to moguće,odnosno da se pokuša osposobiti i druga saobraćajna traka. Prvobitno iz razloga što je zima jako blizu i opšte nam je poznato da se u toku zimskog perioda saobraćaj na toj dionici teško odvija, a sa trenutnim stanjem kakvo jeste očekujemo daleko problema.U takvim uslovima dovodimo u pitanje dolazak djaka u školu iz nekoliko mjesnih zajednica,blagovremen dolazak radnika na posao i niz drugih problema, jer dovoljno je da samo jedno teretno vozilo mora stati i staviti lance,imaćemo zastoje po nekoliko sati.“

Almedin Devedžić:

“ Ja ću izaći sa par inicijativa upućenih gospodinu načelniku. Gospodine načelniče pozivam vas sa ovom inicijativom da ubrzate proceduru raspisivanja tendera i realizaciju kreditnog zaduživanja za rješavanje pitanja vodosnabdijevanja u MZ Lukavica.Vi dobro znate o čemu se radi. Potrebno je što hitnije izvršiti pripreme koje su u toku ,što hitnije da se ubrza ta procedura a o tome ste upoznati.Tako da bi se prije zime izvršila hitna rekonstrukcija sistema vodosnabdijevanja u MZ Lukavica. Takođe vas pozivam gospodine načelniče da ubrzate proceduru raspisivanja tendera za asfaltiranje puta Ogradjenica-Prnjavor, to jest puta Sokak.Vi dobro znate o čemu se radi .To je alternativni put u dužini blizu 700 metara koji je i budžetom Općine Gračanica za 2014 godinu planiran, a isto tako planiran u okviru pomoći Federacije BiH,Vezano za sanaciju klizišta,odnosno poplava u ovoj godini. Dobro znate da je taj put već stradao i ukoliko se hitno nešto ne uradi uzalud smo sve ovo radili i uložili silni novac trud i sredstva uložili u njega. Automobilom je sve teže saobraćati a i autobusom takodje. Isto tako htio bi da vas pitam a na prethodnoj sjednici smo raspravljali o tome da sve aktivnosti koje radimo u MZ, treba da kontaktiramo bar nekog člana ili bar predsjednika MZ Lukavica kako bi znali šta se to dešava,odnosno koje su to aktivnosti od strane Općine, odnosno Općinskog načelnika.Ja vas pitam da li treba obavijestiti predsjednika MZ ako je neka firma trebala po narudzbi da dodje u MZ ili možda neku drugu osobu. Konkretno predsjednika SDP-a koji treba da određuje gdje treba mašina da ide da čisti .Ako nam ne treba V MZ,daj da kazemo ovdje ne treba nam VMZ da ga raspustimo.

Da donesemo odluku pa neka radi ko šta hoće, pa nemamo ni mi te odgovornosti, šta se desilo ? U MZ Lukavica je došla mašina za koju niko nije znao po narudzbi načelnika i predata je na upravljanje i raspoređivanje predsjedniku SDP-a. Šta se desilo? Naravno došlo je do incidenta, policija je imala posla samo zato što se nije čistilo po redu .Ako je trebala da se čisti rijeka, uredu,neka koordinira bilo ko. Ali nemože se desiti da se čisti jednom pa se preskače, samo zato što nije član nečega,pa da se čisti drugom. Naravno da je došlo do revolta građana i poziva policije,i desilo se to što se desilo. Evo ja neznam šta je po srijedi ali da razjasnimo ako ne trebaju VMZ dajte da ih raspustimo pa neka radi ko šta hoće.Vi dobro znate koliko mi imamo problema i na prošloj vanrednoj sjednici sam tražio, dajte ljudi da nešto uradimo u toj MZ. Od maja mjeseca se apsolutno ništa nije uradilo. Čak mi se šalju inspekcije a meni ko predsjedavajućem šalje se policija zato što mi radimo i neovlašteno ulazimo u klizista. A dokle da mi čekamo to? To klizište koje je aktivno stotinu godina i dan danas je aktivno. Dokle mi da čekamo da se uspostavi saobraćaj tu. Naša djeca pet kilometara pješke idu, nemogu da idu ni radnici, ni djeca, ni bilo ko. Znači 21.vijek je a mi idemo pješke. Šta nam je preostalo drugo nego da svojim snagama krenemo, dignemo građane MZ Lukavica i da napravimo put. Na tri mjesta smo osposobili taj put. Je li to neki problem,i je li to razlog da se meni šalje inspekcija, da ja dajem izvave? Onaj ko je to uradio baš mu hvala. Očekivali smo u Vijeću da neko dodje i kaže momci, svaka čast. Uspjeli ste na tri mjesta da osposobite put, za koji je neko rekao za deset godina nećemo osposobiti. Je li to podstrek nama na terenu koji radimo od maja mjeseca ,ne vraćamo se svojim kućama. Znam da je predizborna kampanja ali nemojte koristiti Lukavicu, nemojte koristiti njihove belaje, njihov jad i čemer i onu sredinu i uslove u kojima žive u predizborne svrhe. Ja vam kažem ukoliko se nešto radikalno ne promijeni, u koliko se ne uzme sa obnavljanjem ovoga tamo što je porušeno , vjerujete ja ću stati na čelo te grupe građana i doći ćemo ovdje tražiti svoja prava u skladu sa zakonom. Mi više tamo nemamo šta da čekamo.Ovdje je jedan moj sugrađjanin, mjesec dana ne može da dodje do svojih njiva, da izađe na glavnu cestu. Jednostavno rijeka je odnijela sve , nemoguće je popraviti.Treba nam projekat za hitnu sanaciju riječnog korita. Ovo što se sada radi je apsolutno bacanje para, zato vas pozivam da to ne radimo ,daj da uradimo tačku po tačku, tamo gdje se može uraditi. Bez ucjevljivanja obala nema rješenja problema.I molim vas nemojte dolaziti u Lukavicu samo pred izbore, nama takvi ne trebaju. Dvadeset godina nas vuku za nos. Mi smo najzaostaliya mjesna zajednica na općini. I od koga da mi tražimo pomoć? Evo tri sjednice Vijeća ja tražim pomoć ovdje, zovem načelnika, mi moramo raditi nemamo šta čekati, zima ide, šta da mi radimo? Da naša djeca preskaču preko klizišta,da idu pješke u školu, da preskaču preko mina koje je poplava donijela.Od koga da mi očekujemo pomoć. I hvala svima onima koji su pokušali da omalovaže ono što smo mi tamo uradili. Hvala im i neka im je na čast.Toliko.“

Hasić Ibrahim:

“ Mi bi ovdje imali mnogi puno šta govoriti.Ali ne treba baš toliko emotivno govoriti jer neki nemogu doći po mjecec dana kući, neki nemogu po dva,a ja vam odgovorno tvrdim da u Malešićima pet stotina građana četiri mjeseca nemože doći svojoj kući. Nemože donijeti naramak drva,pod pazuh da uhvati ,a kamoli da dodje sa traktorom,zaprežnim kolima, kamionom itd..Prema tome nigdje nije med i mlijeko ,svugdje je propast.Dalje,da vam kažem u Malešićima na našu žalost sad od prije deset dana se krenulo sa sanacijom klizišta. A Malešići su poslije Lukavice slažem se jedne od naj jaćih sto se tiče klizišta .Prema tome ako nema sredstava sredstava nema.Ja ovdje ni u jednom momentu ne govorim u zaštitu načelnika ali me pomelo što ispade da negdje teče med i mlijeko,a u Lukavici je tako .Meni je žao Lukavice i da bogdom se nije desilo to što se desilo u Lukavici ,to je jedno ,drugo ovdje bih kolegi Pjaniću rekao, ja se nemogu izboriti za svoju MZ koja broji 3500 stanovnika,a njemu nije pravo što nije mogao dobiti za Škahovicu,

neznam ja,dva kamiona. Dragi Pjaniću,Škahovica ima svoju aktuelnu vlast ,pa ako nije sposobna da je obnaša nije se trebala prihvatiti toga. Dođem i ja u poziciju da načelnik kaže nema ili nemože biti. A to se sada,da li može neko drugi,može kada ima uslova da kaže da može dobiti taj materijal.“

Safet Pjanić:

“Mislim da me nisi dobro Ibro razumio.Ja sam obećao čovjeku ,obećanje koje mi je dao drugi čovek, za dva kamiona tog šodora,a poslije je ispalo kako je ispalo. Ja sam pitao ima li neko u ovoj Opcini da odobri kamion-dva prljavog šodora, mimo načelnika.To sam ja pitao. Ako je to ružno i loše pitanje neznam šta je dobro pitanje.Drugo ste vi u Malešićima i Lukavici ,o tome ne treba govoriti nikako. Tamo je jad i bijeda,ništa se nije uradilo za ovo vrijeme.Nema gore MZ od Lukavice.Ja sam bio u Malešićima,ali sam bio i u Lukavici i znam o čemu se radi.Treba ovdje postaviti prioritete, šta je najpreče da se ima uraditi .Od Lukavice nema ništa preče.Ovo nisi razumio oko mog pitanja,šta će meni da ja obećavam dva kamiona šodora, a da to ne dobijem.A znate zbog čega? Što je čovjek iz SDA,to je problem.“

Predsjedavajući Vijeća je upozorio vijećnike da se ne razvija diskusija i komentari na iste, jer se radi o vremenu predviđenom za vijećnička pitanja i inicijative.

Zajim Nurić:

“ Ja nemam nikakvu vijećničku inicijativu gospodine predsjedavajući ali bih vas zamolio da sad ne citiram o kome se radi, nemojte ovo pričati dvije minute pred izbore. O svemu ovome se moglo i ranije pričati,a to se naravno odnosi na neke, ne na sve. Postoje V MZ, ja sam iz Škahovice i zato sam se javio. Mi imamo svoje V MZ koje funkcioniše kako-tako. Ja lično mislim ako moj predsjednik Vijeća mjesne zajednice uvaženi, kao što uvažavam i sve druge nije u stanju da riješi problem koji se zove dva kamiona prljave rizle, sve ukupno 160,00 KM, ne treba to da radi.Ako neki misle da treba Opštinskog načelnika zvati za dva feninga, mi smo jad i čemer. I da vam kažem ja neću ovdje da reklamiram svog predsjednika Mjesne zajednice ni u pozitivnom, ni u negativnom smislu, ali tako je sitan problem, a mi o tome ovdje pričamo i to dvadeset sekundi pred izbore a ne govorimo o Lukavici.To je nešto što nam se ne smije dešavati. Neko je već rekao, a evo ja završavam, imaju Vijeća mjesne zajednice i treba da znate da mi prvo pregazimo svoje V MZ i onda rješavamo problem okolo, petsto kilometara. Imaju Vijeća mjesnih zajednica i neka rješavaju i nemojte ovdje sa kamionom rizle da se reklamirate, dvadeset dana pred izbore, molim vas”.

Čamdžić Mirsad:

„Javio sam se što želim da podržim diskusiju kolege Topčagića u vezi sa ovim problemom puta.Naime, poznato je da je taj put samo političkim lobiranjem bačen u zapećak, da onaj put što se od Bukve odvaja prema Srebreniku, u kategorizaciji dobio magistralni pravac.Radi se o spremnosti i zalaganju Srebreničke politike Edina Mutapčića i ostalih ljudi, a slabosti gračaničke politike, odnosno ljudi koji Gračanicu predstavljaju na višim nivoima vlasti.Dotle to ide da je čak gosp.Mutapčić, kolega Topčagiću rekao da je promijenio put prvenstva prolaza u Srebreniku kod ulaza u pekaru, kako bi kad ide iz Sladne imao prvenstvo prolaza u odnosu na put koji je prije imao prvenstvo prolaza odozgo iz Orahovice.Dakle, mi bi ovdje morali pitati više nivoe vlasti šta su one uradile na političkom lobiranju jer je put Gračanica-Brčko od Austrougarske čak i od Turske, i struka je rekla da je taj put u odnosu na ovaj preko Srebrenika prioritet.I samo Srebrenička politika, koja je izuzetno jaka i moćna sa svojim lobiranjem je preusmjerila i dala prioritet to sam istraživao i ovdje sa govornice to mogu odgovorno tvrditi.Podržavam i hvala ti što se boriš za ovo i to je prava stvar.A kad sam već ovdje za govornicom, a takođe je u vezi puta zamolio bih, a mislim da mi gospodin Dedić može odmah dati odgovor da ne čekamo.Kada je Općina Gračanica poslednji put poslala

zahtjev Kantonalnoj direkciji za održavanje puteva za bojenje pješačkih prelaza.Imamo evo problema što je pomenuo Mirza, škole su počele, djeca svakodnevno prelaze preko pješačkih prelaza, a većina pješačkih prelaza u gradu Gračanica je neobilježeno, izbljedio.Oni to održavaju, za lokalne puteve znam da je kod nas.Razgovarajući s građanima o ovom problemu, evo reći ću, mada to nije nikakva reklama, jer sam dobio dozvolu da mogu reći.Ukoliko Općina Gračanica nema sredstava za boju, boju će za kompletno obilježavanje pješačkih prelaza donirati firma Suman.Zato vas molim da mi odgovorite na pitanje“.

Tursunović Esad:

„Htio sam se samo uključiti vezano za ove dijaloge kao predstavnik Stjepan Polja.Mi iz Stjepan Polja ovdje imamo 4-5 vijećnika i nikad niko u ovom zadnjem periodu kad je nastao problem i taksirat, nismo insistirali na Stjepan Polju, na pomoći Stjepan Polju i na stvarima koje nas sleduju.Za dvije godine od 200.000 koliko je aplicirano Stjepan Polje, dobili smo šačicu i drži nas i dalje u neizvjesnosti.Put od Malešića koji gravitira dole prema Stjepan Polju, nasut je do pola do teritorije Malešića.Nazvao je predsjednik MZ, hoćeš-nećeš, nasuto je i gotovo.Mi imamo centralno mezarje gdje je 2.500 stanovnika, i tu se ukopaju, tenkom se ne može prići mezarju.Bagerima se ne može doći.Ništa nije uloženo.Nije iz razloga i što suosjećamo sa Lukavicom i sa Prijekim Brdom i sa Malešićima i svim ostalim. Ovo što je Almedin rekao, svaka mu čast, još je dosta iskrenijih stvari i problema koji se u njega dešavaju reći.Na prošlom Vijeću sam govorio, pet ili šest stvari veoma sitnih koje smo mi aplicirali iz MZ Stjepan Polje, i danas dan nisu plaćene.Nisu plaćeni zato što nema imena i prezimena kome se treba obratiti i još masu problema koje mi ne mogu sad na um pasti. Dobro je mislila sam ovdje da je Haso iz Autoškole, odnosno prijatelj iz Orahovice i on je isto iznio veliki problem rješavanja vodnog područja, odnosno rijeke kod Luka.Kaže da je imao teških riječi sa gosp.Bajićem, da je slabo tekla komunikacija, da su morali svojih sredstava uložiti da bi poredali teško kamenje da im se više ne dešava.Stvarno je ljudi alarmantna situacija, svaki put izlazim i sve to govorim.Nećemo da se suočimo s problemima.Nemamo solidarnosti, nemamo ništa.Mi iz Stjepan Polja najbolje razumijemo i najmanje dobijamo iz razloga nadajući se da će ostale MZ dobiti, da će otići gdje treba.Međutim, ništa se ne dešava, a vjerujte ne da je politički, ovo što je kolega Zajim rekao, prije tri minute do izbora.Ovo je cijelo Vijeće politički cijelo vrijeme, ako imaš nekoga, oni će ti to i uraditi.Načelnik bi trebao biti načelnik svih građana, budite tako.Ja nisam predstavnik Stjepan Polja.Ja sam predstavnik svijuu građana.Što ne dođete u Stjepan Polje? Jeste li pozvani na sve manifestacije u Stjepan Polju? Zvao sam Vas milion puta, dođite, milion problema je bilo“.

Mirsad Čamdžić:

„Ja se izvinjavam pomenuo sam firmu Suman, a radi se o firmi Motorex koja se ponudila da obezbijedi boju za prelaze, vlasništvo Mirsada Sumana. Samo to“.

Općinski načelnik Nusret Helić:

„Hoću da kažem par rečenica. Očito, imate pravo, predizborna je kampanja, imate pravo pričati svašta, ali morate pričati istinu.Reći ću vam zbog čega morate pričati istinu. Idem redom. Mirza je spominjao tuču. Tačno je problem sale, mi smo ponudili Srednjoj školi ono s čime raspolažemo da koriste našu Sportsku salu koja je na raspolaganju tako da bar koriste neke termine obzirom da je ovo gore belaj. Drugo, u budžetu Kantona za ovu godinu naši prijedlozi su uvršteni i 200.000 za zatvaranje ove sale.Mi nismo dobili dinara. Ekspertna vlada nije dinara odobrila. Prošle godine smo je pokrili našim sredstvima kredita.dakle ova sala je na raspolaganju, neka se dobro organizuju i iskoriste termine koji su slobodni, a prije podne do predveče je slobodno sve. I to je jedan od načina.Jeftinije je odvesti djecu, dva odjeljenja i organizovati nastavu tjelesnog odgoja.Pjaniću, izvini, ko u tebe u firmi odobrava kad daješ pare.Imaju V mjesnih zajednica, a vama daje da se razriješi ovo kad nas je poklopilo 80 miliona šteta. Da redovno vršimo i održavanje a tamo i klizišta da saniramo.ljudi božiji, nema para. Kakva politika, kakav SDP. Ja ću vam

dokazati na sledećoj sjednici da smo više dali rizle tamo gdje je SDA na vlasti, ne zbog toga što je ovaj ili onaj, nego zato što su veći problemi. Neka izađe gosp. Tursunović i kaže koliko vrijednosti rizle smo prema Spreči u Polju dali. Preko 5.000, jeli u Stjepan Polju SDP pobijedio, a šta ću ja što je ponovo voda odnijela. Gadžić neka bude pošten, nek kaže koliko je gore u Prijekom Brdu, neka kaže Almedin, a ne, što reče, na sramotu načelniku, nema ga u Lukavici. Ja sam u subotu bio u Lukavici i gledao probleme i zato nisam bio u Stjepan Polju. Znae zašto sam otišao, nećemo voditi plemiku. Otišao sam jer smo dali naredbu Gramatu prije mjesec da očisti rijeku čitavu. Znae šta je očistio. Tri lokacije. Znae li da je sanirana obala uz njegovu parcelu? Je li znae? Sve drugo je kaos. Ja kad sam vidio, prepa sam se. Ali sam otišao pošto sam se čuo sa direktorom fonda i zamolio ga da nam hitno interveniše i da obezbijedimo bar jedan prelazni most preko te rijeke, jer ima tamo naselje. Na tri lokacije odnijelo most. I da znae vrijednost jednog mosta dvjestodeset, drugog stodvadeset i ovaj treći kojeg možemo brzo riješiti i riješit ćemo, očekujem sredstva i možda i danas fond zasijeda po zahtjevu načelnika da riješe. Ja sam naredbu dao da se rijeka čitavom dužinom pročisti da eventualno spriječimo manje poplave, da ne naprave štetu. I svugdje je to urađeno, samo nije u Lukavici do kraja, nego samo na pet šest parcela. I onda je otišao načelnik i dao naredbu da se radi redom. Neko će podnijeti za to račun. Vi pričate o tom putu, pa u Lukavici je do sada najviše uloženo, a i treba. I prosječen put i napravljen. Pa znae da ide prema Svjetskoj banci da se iz onih sredstava odobri za Lukavicu. Jesmo li donijeli takvu odluku. Znae kakve su procedure. Nema tendera dok oni ne odobre, pa se tender vodi po njihovim principima, pa oni biraju i dolazi izvođač. Prolazi sigurno jer je u tih šestosedesetdevet Lukavica sa 150, mi namirujemo 40 hiljada iz budžeta, i treba sačekati. Nemojte mi to, narod sluša, načelnik sad neda da se pravi. Imaju procedure, ja neću potpisati ništa mimo zakona, budite sigurni. Nemojte me objeđivati u to. To kad kažete u Lukavici nije ništa urađeno, halal vam. Ja sam u Lukavici najviše proveo i znaš i ti sam, a nisi tako pričao dok nisi imenovan za direktora. Vjerovatno je nešto drugo bilo. Ja sam načelnik svih građana, dokazat ću vam da nigdje nije dato zato što neka stranka preferira. I meni ovo za stambene kuće ide sporo, ali tek poslije ovoga ide Pravilnik, raspisuje se konkurs i ljudi svi, i oni što su pojedini drečali u Donjoj Orahovici, da nisu na spisku za crijep. Raspisuje se poziv na kome ima pravo da aplicira svako ko je oštećen i valja mu potpisati da je oštećen, mogla je komisija promašiti svi, i uz određene kriterije, dijele se sad novci za one koji nisu dobili crijep. To je transparentno i zakonito. Neko reče načelnik dijeli crijep, ja nemam veze u Orahovici tamo. Načelnik je obezbijedio za tri dana 500.000 KM kao nikad. I podijeljeno je crijepa, a moguće je i da je neko dobio više, ali ide sad za one koji nisu dobili crijep. Ima negdje blizu oko dvestapedeset hiljada KM i svi će dobiti i doći spram onog koliko je oštećen. Jeli to pošteno, jeli to transparentno, jeli to zakonito. Ni jednom ja nisam poslao crijep nikom. A bilo je koliko hoćete SDP-ovaca koji su tražili, pa sam pitao kakav crijep. Ja ako mogu iz džepa, ja mogu dati za crijep. Dobit ćete pismeno o svemu ovom što ste pričali“.

Zijad Dedić je odgovorio na pitanje Mirsada Čamdžića:

„Prije 25 dana tačno proslijeđen zahtjev prema Kantonalnoj direkciji cesta za nužno saniranje puta Gračanica-Bukva-Srnice. Odgovor je došao prije deset dana da je radove dobila firma „Roading“ i oni će sanirati, i čekaju 25. 10. kada i zvanično prelazi ova dionica puta u nadležnost Direkciji. Isto to je urađeno i za boju, ali ima procedura tendera koja se mora sprovesti za dobijanje radova obilježavanja horizontalne i vertikalne signalizacije“.

Almedin Devedžić je replicirao načelniku:

„Načelniče, nemojte mi hljeb dirati, od njega hranim djecu. Znači to nema veze s politikom. Dalje, što se tiče ove mašine koja je došla tamo. Mašina je došla po naredbi i vozač je imao nekog da se javi predsjedniku SDP-a, a ne predsjedniku Vijeća MZ Lukavica. Ja o tome govorim. Dakle po logici stvari trebao se javiti predsjedniku Vijeća MZ Lukavica kako bi on rasporedio. Što se tiče Gramata, u Gramatu je mašina i kvaru. Uradio je jedan dio ali nije završio i ako bogda završit će. Što se tiče riješenih tačaka ja opet tvrdim ovo čišćenje rijeka je bacanje para. Hajde da uradimo kritične tačke onako kako treba, a što se tiče rješavanja jedne tačke pored moje parcele, naravno igrom slučaja je tu moje zemljište. Riješili smo kuću čovjeku koji dvadeset godina nosi poplava i koja je došla do njegovog praga“.

Dedić Zijad:

„Da znate da smo mi angažovali projektanta iz Projektnog biroa Spreča Tuzla i da je on obišao 9-10 vodotoka i između ostalog je obišao i vodotok u Lukavici. Očekujemo za par dana njegovo rješenje za sanaciju tih vodotoka. Ovo je na pitanje Devedžić Almedina oko vodotoka“.

Prešlo se na raspravu o predloženom dnevnom redu 23. sjednice Općinskog vijeća Gračanica.

Nije bilo učesnika u diskusiji i dnevni red 23. sjednice Općinskog vijeća Gračanica glasi:

1. PROGRAM ZBRINJAVANJA GRAĐANA I POMOĆI U OBNOVI I IZGRADNJI STAMBENIH ZGRADA UGROŽENIH POPLAVAMA I KLIZIŠTIMA U VRIJEME PRIRODNE NESREĆE NA PODRUČJU OPĆINE GRAČANICA.
2. RJEŠENJE O OSNIVANJU KOMISIJE ZA RAZMATRANJE PRIGOVORA.

Dnevni red je jednoglasno usvojen.

TAČKA 1

PROGRAM ZBRINJAVANJA GRAĐANA I POMOĆI U OBNOVI I IZGRADNJI STAMBENIH ZGRADA UGROŽENIH POPLAVAMA I KLIZIŠTIMA U VRIJEME PRIRODNE NESREĆE NA PODRUČJU OPĆINE GRAČANICA

Uvodno obrazloženje po prvoj tački dnevnog reda dala je Aida Hodžić šef Službe za upravu, a u ime tima koji je radio program:

„PRAVNI OSNOV

Pravni osnov za donošenje ovog Programa su Zakon o lokalnoj samoupravi i Statut Općine Gračanica, a u vezi sa Zakonom o finansiranju pomoći za otklanjanje posljedica prirodne nesreće i obnovu područja zahvaćenih prirodnom nesrećom i Zakonom o prenosu prava vlasništva na nekretninama u vlasništvu Federacije Bosne i Hercegovine, kantona, gradova i općina na nastradalim područjima („Službene novine Federacije BiH“, broj 59/14).

Zakonom o osnivanju Federalnog fonda za pomoć nastradalim područjima od prirodne nesreće na teritoriji Federacije BiH („Službene novine Federacije BiH“, broj 59/14) osnovan je Federalni fond za pomoć nastradalim područjima od prirodne nesreće na teritoriji Federacije BiH (u daljem tekstu Federalni fond) a osnovna djelatnost Fonda je osiguranje prikupljanja i upravljanje finansijskim sredstvima za pomoć nastradalim područjima.

RAZLOZI DONOŠENJA

Prioritet u raspodjeli prvih novčanih sredstava za pomoć nastradalim područjima u Federaciji BiH imaju porušeni i oštećeni stambeni objekti. Općina Gračanica, je postupajući po Zakonu o prenosu prava vlasništva objavila Javni oglas za prenos prava vlasništva na nekretninama u vlasništvu Općine i ne čekajući sredstva od Federalnog fonda obezbijedila sredstva za pomoć za porušene objekte u iznosu od 100.000,00 KM.

Prva sredstva za pomoć su pristigla u Općinu, a nakon stupanja na snagu pomenutih Zakona i objavljivanja pratećih pravilnika u uredbi, Federalni fond usmjerio je prva novčana sredstva za izgradnju stambenih objekata na područje Tuzlanskog kantona. Općina Gračanica je prema Odluci Vlade TK-a iz tih sredstava dobila sredstva u iznosu od 143.000,00 KM.

Izradu Programa zbrinjavanja građana čije kuće su uništene i programa sanacije oštećenih stambenih objekata zahtijevala je od općina Vlada Tuzlanskog kantona, pa su ove programe na općinskim vijećima donijele i općine iz okruženja: Tuzla, Lukavac i Srebrenik.

OBRAZLOŽENJE POJEDINIH RJEŠENJA

Za Općinu Gračanica bilo je potrebno, radi raspodjele sredstava, sačiniti Program zbrinjavanja građana i pomoći u obnovi i izgradnji stambenih objekata ugroženih poplavama i klizištima. Programom je utvrđen način pružanja pomoći građanima u obnovi i izgradnji stambenih jedinica i stambenih zgrada ugroženih poplavama i klizištima u vrijeme prirodne nesreće, korisnici sredstava, izvori sredstava, kriteriji za odabir korisnika, provođenje postupka i druga pitanja, a sve u skladu sa odredbama naprijed navedenih zakona.

Programom su utvrđeni opšti kriteriji koje moraju ispunjavati korisnici sredstava, a tačkom VI predviđeno je da bliže kriterije odredi Općinski načelnik posebnim propisom, a što će uslijediti odmah po usvajanju ovog programa.

Članom IX stav 4. predviđeno je da se dodjela novčanih sredstava za pomoć u obnovi uništenih i oštećenih stambenih objekata vrši po raspisanom konkursu koji provodi Komisija imanovana od starane Općinskog načelnika. Na ovakav način će biti dodijeljena i namjenska novčana sredstva pristigla za otklanjanje šteta od posljedica grada na objektima u Donjoj Orahovaci i Rašljevi, i na taj način će se otkloniti i eventualne greške nastale prilikom prve raspodjele crijepa od strane kriznog štaba mjesne zajednice, zbog koje neki građani smatraju da su oštećeni“.

Sjednici je pristupio i Selimović Senad.

Komisija za propise i statut je takođe razmatrala Program i nije imala primjedbi.

Učesnici u diskusiji su:

Esma Pašić:

„Evo vezano za ovu prvu tačku dnevnog reda, ja ću malo prodiskutovati i iznijeti stav Kluba vijećnika SDA. Programom zbrinjavanja građana i pomoći u obnovi i izgradnji stambenih zgrada ugroženih poplavama i klizištima u vrijeme prirodne nesreće na području općine Gračanica, je važno napomenuti da sredstva koja su planirana programom budu usmjerena transparentno, znači sve mjesne zajednice po prioritetima i kriterijima koji su propisani ovim programom. Zašto naglašavam transparentno? Zato što treba da posmatramo u tom pravcu i da se ne osvrćemo puno na to što je izborna kampanja, da ne prikupljamo izborne poene, kroz ovu situaciju odnosno elementarne nepogode, klizišta i napomenuti želim sa ove govornice kao općinska vijećnica uputiti ,olbu stanovništva koga su ove elementarne nepogode zadesile. Ne smijemo nikako zaboraviti da je jesen već nastupila, a i zima je na pragu idu hladni dani, padavine i niske temperature. Mi moramo za sve naše mještane što hitnije obezbijediti da sredstva stignu što prije do njih, kako bi mještani što prije imali siguran krov nad glavom, prohodne i sigurne puteve do svojih stambenih i drugih objekata. takođe važno je napomenuti i ne smijemo zaboraviti ni to da naši učenici svakodnevno putuju do škola putevima koji su oštećeni klizištima, obrušeni i na nekim mjestima potpuno uništeni. Dakle, apelujem na Općinsko vijeće da podržimo ovaj program kako bi se što prije utvrdili kriteriji i u skladu sa raspoloživim sredstvima što prije realizuju, da se što hitnije imenuje komisija i da se pokrene postupak za dodjelu novčanih sredstava za pomoć u obnovi uništenih i oštećenih stambenih objekata po raspisanom konkursu. Toliko i hvala“.

Vijeću se obratio i Općinski načelnik Nusret Helić, te iznio slijedeće:

„Mislim da je dobro da znate par informacija obzirom da je vrlo značajno. Dakle, ni jedan dinar, ni jedna odluka, sem što je donesena na osnovu ove komisije koja je utvrđivala prioritete, odluka o raspodjeli po 3.000 odnosno 2.000 za one u prvoj fazi. Hoću da vam kažem da deset dana prikupljamo, a pričamo o Vijećima mjesnih zajednica, prikupljamo tekuće račune od građana. Deset dana a još nismo prikupili tekuće račune da potpišemo ugovore, a pare leže. Hoću da uputim i na vas, molim vas, tamo ste s ljudima, mi smo dostavili koji ljudi, da nam donesu račune da možemo potpisati ugovore. Do sad, to je ono što smo mi izdvojili, dakle iz naših sredstava, samo je leglo 140.000 KM od fonda preko Vlade TK o čemu je govorila i

Aida i znate li kakva je odluka. Za četiri objekta, po 39.000 evo vi recite koja su to četiri objekta. Pokušavamo s njima da vidimo, kako. Evo vidjeli ste u ovom Programu, bit će Pravilnik, bit će kriteriji i mi ćemo utvrditi bod listu. Ovo što kažete transparentno, zato i idemo. Utvrdit ćemo bod listu i tamo ćemo po tom sistemu nekom ići. Da znate, prvi četiri ako dobije po ovom sledećih trideset, eto ih pred Opštinu. Hoću da vam kažem koliko je složeno. Nisu ni oni posložili kriterije, nego jednostavno Gračanici pripada stočetrdeset, jer su imali podatke o srušenim, za četiri kuće oni odredili po 39.000 KM. Nama to valja dobro izučiti, hoćemo li to tako ili ćemo tražiti nešto drugačije. Drugih para nismo dobili za kuće još. Dobili smo 300.000 za crijep i evo sad će ići javni poziv i svi oni koji su oštećeni, ali će morati potpisati pod krivičnom i materijalnom odgovornosti da je tačan podatak koliko je crijepova oštećeno. Da se vratim na početak. Digli smo trideset ljudi da brzo dođemo do podataka koliko je štete, da bi kandidovali gore. I promašilo se, neki su ljudi rekli da mu je 7.000 crijepa otišlo. Taj referent nije mogao brojati i on je upisao. Ovo će sad biti pravi podatak, kad se on prijavi, pa potpiše a neko izađe provjeriti. I dat ćemo novac spram one štete kolika je. Imamo toliko novca. Ovo sam iznio samo da znate koliko je stiglo para. I stiglo je za privredu 60.000 ali opet odluka da se da onima koji su imali do tri zaposlenika. To su mali obrtnici i mogu dobiti do 2.000. Gračanici je pripalo za 30 takvih i sad ćemo raspisati konkurs. Ovo sam iznio da znate, da ni jedne odluke načelnik nije nikom dao dinara odavde. Možda je i mogao, ali upravo iz razloga što hoćemo da to ide transparentno, da svako konkuriše i spram kriterija koji budu dobit će onoliko koliko mu pripada. Uvijek imajte na umu da je ova pomoć, ne namirenje štete. Pomoć za krovove, pomoć za kuće, koliko para imate. Budite uvjereni da ćemo u toku sedmice donijeti odmah Pravilnik, formirat komisiju i raspisat javni poziv za ono šta treba priložiti i da će to biti transparentno i zakonito“.

Program zbrinjavanja građana i pomoći u obnovi i izgradnji stambenih zgrada ugroženih poplavama i klizištima u vrijeme prirodne nesreće na području općine Gračanica je usvojen jednoglasno.

TAČKA 2

RJEŠENJE O OSNIVANJU KOMISIJE ZA RAZMATRANJE PRIGOVORA

Obrazloženje je dala Aida Hodžić:

„Na sjednici Općinskog vijeća održanoj 28. 08. 2014. godine doneseno je Rješenje o imenovanju Komisije za provođenje javnog konkursa u postupku prenosa prava vlasništva na nekretninama u vlasništvu Općine. Javni konkurs za prenos prava vlasništva objavljen je u ponedjeljak 15. septembra na web stranici Općine, a 13. 09. 2014. godine u sredstvima javnog informisanja. U samom konkursu tačka pet navedeno je da će učesnici konkursa protiv Odluke o odabiru moći podnijeti prigovor Komisiji za prigovore. U skladu sa članom 7. Pravilnika o postupku objavljivanja konkursa za prenos prava vlasništva na nekretninama u vlasništvu Federacije BiH, kantona, gradova i općina na nastradalim područjima Općinsko vijeće donosi Rješenje o osnivanju Komisije za razmatranje prigovora. S obzirom da je konkursna procedura završena, jučer 29. 09. 2014. godine bilo je neophodno izvršiti imenovanje ove Komisije kako bi nesmetano mogao biti proveden i drugostepeni postupak po eventualnim žalbama. Članom 10. stav 3. Pravilnika o postupku objavljivanja konkursa za prijenos prava vlasništva određeno je: „Odluka donesena o prigovoru je konačna“ pa je tako određeno i Rješenjem“.

Komisija za propise i statut nije imala primjedbi.

Nije bilo učesnika u diskusiji i Rješenje o osnivanju Komisije za razmatranje prigovora je usvojeno jednoglasno.

Nakon završetka sjednice po predloženom dnevnom redu, Vijeću su se obratile:

Dulić Kasima ispred sindikata Grafopaka Gračanica je u ime radnika iznijela problem nemogućnosti radnika za uplatu zdravstvenog osiguranja i zamolila je vijećnike da im pomognu oko uplate bar za jedan mjesec.

Na ovu konstataciju za diskusiju se javio Krajinović Nihad:

„Zamolio bih gospođu da mi odgovori, ako zna jer ja imam informaciju da je neki dan u firmi Grafopak prodat jedan viljuškar, a da ste se vi dogovorili sa direktorom ili vršiocem dužnosti, ne znam koju funkciju trenutno obavlja, obnaša, da će sva sredstva koja pristignu od prodaje dijela imovine Grafopaka biti usmjerena upravo na plaćanje zdravstvenog osiguranja za vas. Pa ako je istina da je prodat viljuškar, imate li vi kao radnici informaciju šta je s tim novcem, šta je on uradio s tim novcem“.

Ne izlazeći za govornicu Đulić Kasima je odgovorila da njima niko ne polaže račune i da nisu upoznati s tim jeli to tačna informacija.

Safet Pjanić:

„Evo ovako, ja bih želio da pomognem ovoj gospođi Đulić, da zamolim ovdje u Vijeću ako ima raspoloženja od nas par privrednika da to uradimo za ovaj mjesec. Ako nema, evo ja ću vam to uplatiti sad i riješit ću to sutra. I uplatit ću vam jedan mjesec za knjižice, kad mogu za 1.300 mogu i za vas izbrisati. To je što se tiče zdravstvenog, a o ostalom ćemo se dogovarati“.

Vijeću se obratio Mulalić Muhamed iz Lukavice u ime mještana naselja Luke koje ima osam kuća:

„Ja ću prvo postaviti pitanje mome predsjedniku uvaženom gospodinu Devedžić Almedinu mom komšiji. Jeli istina da niko nije znao do neki dan za naš problem, da je naš most oštećen i da mi nemamo prilaza? Jeli istina da mjesec dana ne želite samnom komunicirati? Kad ste mogli manipulirati samnom lično, vi ste me telefonom zvali. Više se niste javljali. Pokušao sam da se obratim Opštini, nisam uspio. Niko me nije htio primiti, nego mi je rečeno od strane sekretarice da ja moram odnosno mi napisati neku peticiju pa tek onda da dođem. Ja to ne mogu razumjeti. Ja ne zastupam sebe lično i vi znate da ja sutra mogu otići iz ove BiH. Došao sam iz Amerike, došao sam da živim. Sa ovakvim načinom neće se ništa uraditi i ja mogu otići ali tu ima još ljudi koji žive. Mi nemamo mosta četiri mjeseca a vi ništa niste uradili. Na Plenumu mi je rečeno da sa našom situacijom niko nije upoznat. Ona mašina što je gore, da li je prisutno stručno lice, jer ste u pravu kad kažete da će ono prva poplava odnijeti. Ono je je istina. Ima gore mašina koja se izgleda gore samo vozi tamo-amo. Niko to nenadzire“.

Devedžić Almedin:

„Naravno, najlakše je fakturisati MZ, to je najlakše. Zavisi samo koja je tamo vlast, ako je jedna onda uredu, ako je druga onda ne treba. Muhamede ti dobro znaš koliko smo mi reagovali za problem Luka. Prva poplava koja je bila odnijela je tri dunuma zemljišta od tog naselja, odnijela pristupni put i zakrenula most. Komisija koja je popisivala štete je uredno obaviještena, snimila, slikala sav teren i uredno evidentirala da su tu problemi, kao što je sve ostalo uradila. Vijeće Mjesne zajednice je svojim sredstvima vojna mašina je angažovana, i sa svojim gorivom je popravila kako je bilo. Put je napravljen ali do prve poplave. Prva poplava je došla i opet isto odnijela. Zato ja kažem da nije rješenje ovo što se radi. Rekao sam ti da to naselje skupi samostalno novac, Općina će dati mašinu, da bi se taj dio kvalitetno riješio. Pristupni put se mora stijenama zaštititi. Nema druge. I nije korektno od tebe da mi kažeš da se ne javljam. Ja s tobom komuniciram tri mjeseca i moram ti reći, rješenje za ovo je samo ovako kao što sam rekao, a bio je i hidrolog i rekao da se to tako uradi a zato treba 30.000 KM. Taj koji ti je rekao da niko ne zna za vaš problem, taj laže. Reci mu da laže. Vijeće Mjesne zajednice Lukavica je uradilo sve što je u njegovoj moći, sada je sve do Opštine“.

Hajdić Šemsudin:

„Dođoh i do vas ovdje da se konačno i vama obratim. Mnogi su upoznati s mojim problemom i na mnoga sam se vrata ja pojavio u ovoj našoj zgradi. Ali nisam dobio nikakve pomoći ni sa jedne strane. Izgubio sam od majske poplave, pristupni put svojoj kući. I zato vas molim, kako da riješim taj problem. Sada idem alternativnim putem kojeg sam dobio od svojih sugrađana da koristim, kako bi normalno funkcionisao, djeca u školu, supruga na posao itd. Ono je rješivo na takav način da se uradi korito rijeke sa strane moje kuće i to u naselju Pašalići. Mnogi su dolazili, ali ništa se nije riješilo. Molim vas a i načelnika da riješimo ovaj moj problem“.

U ime grupe građana koja je protestovala u Donjoj Orahovici, Vijeću se obratila Mujić Mejra:

„Obraćam vam se u ime nezadovoljnih građana u Mjesnoj zajednici Donja Orahovica. Svi vi znate da je Donja Orahovica najmnogoljudnija Mjesna zajednica na općini Gračanica. Odprilike 5.500 stanovnika a ja se obraćam ispred onih 5.000, oko 500 neću brojati, a znate zašto. Zadnji protesti koji su se desili u Mjesnoj zajednici Orahovica Donja, a potom ispred zgrade Općine Gračanica jasno govore o našem nezadovoljstvu. Mještani Donje Orahovice su žalosni na vaše izjave, izjave načelnika, izjave pojedinih vijećnika. Znači, žalosni što nema para, ali nisu iz tog razloga

nezadovoljni. Mi smo nezadovoljni raspodjelom sredstava, znači onog što imamo. Nezadovoljni smo radom kompletnog Vijeća Mjesne zajednice Donja Orahovica sa predsjednikom Gazibegović Admirom. Ja lično s njim nemam skoro nikakvu komunikaciju jer on nerado komunicira sa mještanima Donje Orahovice“.

Nakon ovog Mujić Mejra je iznijela sve činjenice koje su uzrok nezadovoljstva, što je iziskivalo potrebu da se Vijeću obrati i Gazibegović Admir:

„Evo pošto sam prozvan, i da odgovorim. Što se tiče ovih protesta, ljudi su nezadovoljni. Normalno, kad nema dovoljno crijepa, milion i tristo komada crijepa treba podijeliti, a dođe deset hiljada ili dvadeset. Kako odrediti prioritete. Nađite vi modus, a oni koji rade u Vijeću Mjesne zajednice i koji su predsjednici Vijeća Mjesne zajednice, znaju kako je to što se tiče rada Vijeća MZ, Vijeće MZ funkcioniše dobro, Krizni štab je formiran, zna se na osnovu čega. Od maja mjeseca, svi koji su htjeli raditi, uključili su se, a ja sam mobilan bio danonoćno. I na koritu rijeke i u kačaniku i svugdje što znači da meni to nemožete imputirati. Što se tiče grada, 900 objekata je stradalo. Od toga ovaj spisak u rijeci, od ovih sedamdeset i nešto ljudi na osnovu njihovih izjava koje će orati potvrditi, to je 18.000 i hvala bogu da nije i tamo zahvatilo. Škola je pokrivena, dom pokriven i non stop se radilo. Valja pronaći prioritete a prvo je trebalo pronaći novac. Ja sam najviše volio, ili da je došao crijep, ili da su sredstva ostala u opštini pa da se svima ravnomjerno podijeli. Nismo mi krivi što je takva situacija. Ljudi ksu umali dvije ili tri poplave i koje je led oštetio, manje protestuju nego neki drugi. Ja nemam šta više reći. Što se tiče Vijeća Mjesne zajednice u prošloj godini 160.000 je u Donju orahovicu uloženo iz Općinskog budžeta. Ako to nije dovoljno onda ja ne znam šta je dovoljno“.

Na kraju se Vijeću obratila i Larisa Šuša, Plenum Gračanica:

„Zaista vam neću oduzimati puno vremena ja bih zamolila gospođu Bidu, pošto načelnika nema, ne znam kakva je procedura, samo da nam date odgovor vezano za projekte za te kuće. Da li će biti urađeni za Lukavicu znači tipski projekti za sve kuće? Hoće li to biti objavljeno, na koji način, pošto nam se već javljaju neki donatori koji bi da dođu do polovine oktobra u Gračanicu i da pomognu u izgradnji tih kuća. Pa evo samo kratak odgovor“.

Rahim Gadžić:

„Ja bih predsjedavajući tebe zamolio, da ti ipak kažeš, nadležnosti Opštinskog vijeća. Mi se danas nalazimo pred ljudima, slušamo ih a ne možemo ništa riješiti i izglasati. Nebih želio da ljudi danas ponesu utisak da Općinsko vijeće ništa ne radi. Vi znate kako se kreira budžet i kako se može pomoći ljudima kad dođu zahtjevi i prijedlozi. Sve smo danas saslušali, a nemoćni smo. Ispade sad ovdje neko proziva koji su ovdje vijećnici više radili, a koji manje. A ja možda radim više jer sam u Prijekom Brdu. Ne želim da me neko svrstava u nešto a da ne mogu ništa. Molim vas da o tome upoznate građane“.

Predsjedavajući Vijeća je pročitao član koji reguliše mogućnost prisustva građana, sjednici Općinskog vijeća.

Aida Hodžić je dala odgovor na pitanje Larise Šuša.

Sjednica je završena u 13,35 sati.

Zapisnik vodila: Mevlida Naimkadić

Tonski snimak sjednice uredno je arhiviran.

ZAPISNIK VODILA:

Mevlida Naimkadić

PREDSJEDAVAJUĆI
OPĆINSKOG VIJEĆA
mr. sc. Edin Ibrišević